


Sel Prestuhn Henry B. Eyring

Mwet in Kahsrh Se
Met ke Prestuhnsi Se Met



Engan nuh Selos suc Kuht Luhngse

Kuht nuhkwea kena tuh engan in yohk nuh selos suc kuht luhngse, ac kuht kena tuh in srihk mwe ahktoasr elos puhlakihn uh. Ke kuht riti sramsram in engan—ac kweok ke—ke Puk luhn Mormon, mokle-yuckyak insiacsr ke kuht nuhkuh ke mwet sacohk lasr uh. Pa inge sie sramsram pwacye ke sie pacl in engan:

“Ac tukun ma inge na wacngihn fohs fin acn sac, ke srihpen luhngse luhn God sucoasr insiacn mwet we ah.

“Ac wacngihn srahngwesr oa, kuh lokoalok, kuh nuhnak in koase, tiac kosro, tiac kikiacp, tiac ahkmas, kuh kuhtwena ohiyac kuhpahtol; ac pwacye tuh wacngihn na mwet engan yohk inmahsrln mwet suc God El oraclah nuhkwea oacna mwet inge.”

Na kuht riti:

“Ac fuhkah luhpan in sewowo lalos! Tuh Leum El ahkin-sewowoyaclos na ke orekma lalos nuhkwea; ahok, elos in sewowo ac kapkapwack lalos sun yac siofok singucul; ac fihl se met ma Kraist wacngihnlac, ac wacngihn fohs fin acn we nohfohn” (4 Nephi 1:15–16, 18).

Mwet tuhma lutlut luhng kuhlwacng luhn Kraist pruhe ac orekma nuhke kain mwe in sewowo inge nuh sin mwet sahyac ac nuh selos sifacna. Ke sramsram ke Puk luhn Mormon ac, puhs na inmahsrlosr, ke puhla lasr sifacna, kuht etuh lah mwe sang ke engan uh kuh in utuckuh. Kuht etuh lah innek in engan uh el arlac mahki kahlwem. Kuht oacyacpac etuh lah karihngihnyacn in engan uh el tiac fihsrwacsr ne kena, oacna ke i tukun muhtwacta luhn

Mwet Lahngo nuh sin mwet Nephites ah, “luhngse luhn God” oan insiacsr.

Luhngse sacn oasr tari insiacn Mwet Nephi ke srihpen elos liyacacng masap se suc oruh kuh in sikyak ohinge. Kahs in ahkuhtweyac ke masap sacn sukokyak ke pruhe ke kuhfa luhn Leum, suc muhtwacwacack ke sie kwacfe nuh sin Pahpah Tuhmasr Inkuhsrao. Kuht pruhe ke luhlalhfongi yohk luhn insiac, ac ke luhngse pwacye nuh, sin Mwet Lahngo lasr uh. Kuht eiskuhtyang ke insiacsr in eis Inel, in esamuhl, ac in liyacacng masap nuhkwea Lal. Sahflah, kuht moulkihn luhlalhfongi muh Nguhn Muhtahl, pa mempuhr ahktolu ke Sifac ke God, ma kuh in wi kuht pacl nuhkwea, suc fahkwack nuh insiacsr ke Pahpah ac Wen Kuloh Nahtuhl. (Liye D&C 20:77, 79.)

Ke kolyuck luhn Nguhn Muhtahl, insiacsr kuh in eklac tuh kuht in luhngse ac suli luhngse luhn Pahpah Lucngac Leum Jisus Kraist. Ohiyac nuhke eisyacn luhngse luhn God nuh insiacsr uh fihsrwacsr, oacpacna nuhke ohiyac in ahkwacngihnyacnah puhla in luhngse uh ke insiacsr. Tuh fin muh, mwet se sulacnah in tiac arlac pruhe penga na pacl nuh sin Pahpah Lucng kuh in tiac ahkfalye sie tahfuh singucul kuh in tui ke lutlutkihn kahs luhn God kuh in pihlesruh mwet suhkahsrup kuh mwet kwacoh.

Kuhtwena sulacnah ma in tiac liyacacng masap luhn Leum kuh na in luhslah Nguhn liki insiacsr. Ke wacngihnlac luhn nguhn, engan uh srihkeni.

Engan se ma kuht finsrakkihn nuh sin mwet lasr kuh in sikyak wiwi na sulaclah lalos an. Finne yohk luhpan luhngse lasr nuh sin tuhlihk se, mwet sirapei se, kuh kawuck se, kuht tiac kuh in sap kuh nuh selos in liyacacng masap tuh elos in fal in eis kolyuck ac ikihlyuck luhn Nguhn Muhtahl ke ekuhlah insiaclos.

Pa sis kasruh se ma wo emet kuht in sang nuh selos suc kuht luhngse uh pa in lwelah elos in sifacna liyacacng sulaclah lalos. Alma el oraclah ke sie puhsren siyuck ma kom kuh pac in wi oruh.

“Ahkpuhsisaclye kowos ye muhtuhn Leum, ac pahngon ke E muhtahl lal, ac lohacng ahkwoyac ac sikalweni na in pruhe, tuh kowos in tiac srihfeyuck yohk liki kuh lowos, ac tuh in kolyucklac sin Nguhn Muhtahl, in puhsisac na, fakpacp, muhtwacnglah, mongfihswacsr, sesseslah in luhngse ac mongfihswacsr in kweok in ma nuhkwewa;

“In luhlalfongi ke Leum; in oasr finsrak tuh kowos fah eis moul ma pahtpaht; in oasrluhngse luhn God insiowos pacd nuhkwewa, tuh kowos in tohuayac ke lwen sahflah ac ilyak nuh in monglac lal” (Alma 13:28–29).

Nga pruhe tuh elos suc kowos luhngse an in eis suliyuck in sulaclah innek in engan ma pahpaht.

LUTI KE PWENG SE INGE

Prestuhn Eyring el luti lah engan suc kuht puhla in moul lasr uh wiwi na sulaclah kuht oruh uh. Ke kowos sramsramkihn pweng se inge, lohacng nuhke ma Prestuhn Eyring el fahk muh kuht kuh in sulaclah in oruh uh (oacna pruhe, orekma, ahkyohkye luhlalfongi, ac eiskuhtyang ke inse pwacye lasr) in kol kuht nuhke inkacnek in engan. Kowos kuh in suliyuck suc kowos luti in suhmuhlah luu kuh tolu mukwikwi ma elos ke oruh ma in kohlohlos nuhke “inkacnek nuhke engan ma pahtpaht.”

MWET FUHSR

Mukwikwi Ma Kol nuh ke Engan

Prestuhn Eyring el luti fahk lah “engan se ma kuht finsrakkihn nuh selos suc kuht luhngse kuh in sikyak wiwina sulaclah lalos.”

Kom kuh in riti ke ma sikyak ma tuhkuh ke sulaclah ke srihkasrak lal Nephi, Laman, ac Lemuel. Laman ac Lemuel tohrkaskahs ac tiac luhngse liyacacng masap (liye 1 Nephi 2:12). Eltahl ac tuhlihk nahtuhlos selngawiyucki ac utiyucklac liki ye muhtuhn Leum (liye 2 Nephi 5:20–24). Nephi el sulaclah in ahkos masap (liye 1 Nephi 3:7), ac ke srihpac sacn, el ac mwet lal “moulkihn moul na engan” (2 Nephi 5:27).

Kom kuh in sulaclah in moul suwohswohs ac engan. Tuhsruhk mwet ma raunikowoslac uh sahp ac srwack oruh sulaclah suhfal ma ac kohlohloslac nuhke kweok kuh puhla koluk. Ke sulaclah an ma lalos in oruh, srihkasrak lowos uh kuh in mokle sulaclah lalos an in wo. Sulaclah lom uh ac use engan fuhkah nuh sin mwet sahyac? Sramsramkihn nuh sin sucu lom ke kain ohiyac wowo ma kowos kuh in sang kahrush mwet suc raunikowoslac ac kahrswelos in puhla engan.

TUHLIHK SRIHSRIHK

Mwe srihkeyuck ke Kuhlwasacng

Ke Jisus El muhtwacta yurin mwet fin acn Macrike ah, El lotwelos in luhngse sie sin sie ac in kuhlwasacng. Mac kom kuh in oruh in ukwe Jisus ac luhngse mwet sahyac? Pa inge kuhtuh mwe nuhnak. Mahkiyac kais sie mwe srihkeyuck an fin kom tari kac.

- Nga kuh in asruhi nuh sin sie suc suhpwacr.
- Nga kuh in kuhlwasacsuhpuh sie mwet in lukmac.
- Nga kuh in riti kuh liyesiesramsram ke toeni luhlaph ma sramsram ke kuhlwasacng.
- Nga kuh in onkihn on luhn Tuhlihk Srihsrihk nuh sin sucu luhk.
- Nga kuh in isracr nuhsin el suc ngwetngwet suhpwacr.
- Nga kuh _____.
- Nga kuh _____.

© 2016 sel Intellectual Reserve, Inc. Kuh ac suwohs nuhkwewa fihliyucki. Sihmlac fin acn USA. Ahkkweyeyucklac ke kaks English: 6/15. Ahkkweyeyucklac ke lweng: 6/15 Lwenglah luhn *First Presidency Message, January 2016*. Kosraean. 12861 868



Luhlahfongi, Sucu,
Kahsrh

Sucu: Sie Mwe Fahkwack nuh fin Facluh

Pruhe ke kom lutlutkihn kuhfa inge ac suk in etuh lah meac kom ac akacsruhi kac. Kahlwem lom ke mwe luti ke sucu uh ac ahkinsewowoye fuhkah elos suc kom karihngihn ke forfor luti lom an? Nuh ke kuhtuh pac ma in etuh, som nuh ke reliefsociety.lds.org.

Ke toeni luhlahp luhn Rilif Sosaiti ke 1995 ah, ke Prestuhn Gordon B. Hinckley (1910–2008) el riti ke “Sucu: Sie Mwe Fahkwack Nuh Fin Facluh,” Bonnie L. Oscarson, jacnuhruhl Prestuhn luhn Muhtwacn Fuhsr, el fahk: “Kuht srui ac sohkihn kahlwem, fihsracsriyacn, ac suwohs luhn fwackyuck inge. . . Mwe fahkwack luhn sucu uh pa ekihn mwe kolyuck in luti ma kuht orekmakihn in sang nuhnuhkuh lahlmwetmwet luhn facluh, ac Nga fahkwack lah mwe luti ma oakiyucki inge . . . pwacye mihsenge oacna ke tuh utuckuh nuh sesr sin mwet pahluh se luhn God ke yac 20 somlah ah.”¹

“Ke fahkwack luhn sucu,” Carole M. Stephens, mwet kahsrh se met ke presituhnsi ke Rilif Sosaiti el tahfuh, “kuht lotwelah lah, ‘Ke moul se met ah, mukul ac muhtwacn nguhn kahlwem kac ac alu nuh sin God suc ekihn Pahpah tuhmwaclos ma pahtpaht’² . . .

“ . . . Kais sie sesr ma ke sucu uh ac enenweyuck ke sucu luhn God.”³

Kuht muhta ke sie pacl ma ninac pahpah enenuh in taran iwaclos

ac sucu lalos an. “Sucu: Sie Mwe Fahkwack nuh fin Facluh” kuh in kol kuht.

Ma Suhmuhsrah Sahyac

Mosiah 8:16–17;
Doctrine and Covenants 1:38

Sramsram Sikyak

“Lee Mei Chen Ho ke Ward, AhkTolu keTao Yuan Taiwan Stek, el fahk lah mwe fahkwack nuh facluh uh lotwelwacng lah sie sin sie luhn sucu kahsrh ahkyohkye ohiyac wowo oacna luhlahfongi, mongfihsrwacsr, ac luhngse. ‘Ke nga srihke in ahkwoyeyuc in fal nuhke mwe fahkwack sac, nga puhlakihn engan pwacye,’ el fahk.”⁴

Barbara Thompson, suc ma oasr in pacl se emet fahkwack se inge ritiyuck ac tok kuhlwacnsap ekihn sie mwet kahsrh ke presituhnsi ke Rilif Sosaiti, el fahk ohinge: “nga motko muh [fahkwack ke sucu] tiac arlac ma nuh sihk ke srihpen nga soenna pahyuck ac wacngihn tuhlihk nuhtihk. Tuhsruhk nga sa

na nuhkwacack, “Tuhsruhktuh ma pac nuh sihk. Nga mempuhr se ke sie sucu. Nga tuhlihk muhtwacn se, tahmtahel se, ninac wiyacn ninac se, kuhsin, tuhlihk muhtwacn nuhtin wiyacn pahpah kuh ninac, ac tuhlihk muhtwacn nuhtin pahpah ninac mahtuh se. . . Finne nga muhkwenah luhlah in sucu luhk uh, nga srwackna ekihn sie mwet ke sucu luhn God uh.”⁵

MA SIHMLAC

1. Bonnie L. Oscarson, “Defenders of the Family Proclamation,” *Liahona*, Mei 2015, 14–15.
2. “Sucu: Sie Mwe Fahkwack nuh fin Facluh,” *Liahona*, Nohfuhmpuh 2010, 129.
3. Carole M. Stephens, “Sucu uh Ma Luhn God,” *Liahona*, Mei 2015, 11.
4. Nicole Seymour, “‘Sucu: Sie Mwe Fahkwack nuh Fin Facluh’ sun Milestone Yac-10,” *Liahona*, Nohfuhmpuh 2005, 127.
5. Barbara Thompson, ke *Daughters in My Kingdom: The History and Work of Relief Society* (2011), 148.

Nuhkuh ke Ma Inge

Fuhkah tuh “Sucu: Sie Mwe Fahkwack nuh Fin Facluh” sie ma sihmlac na kuh in lwen inge?